

## Jambatan Batang Rambungan hadiah GPS untuk warga Tanjong Datu - Abang Johari

- 2019-11-24T15:25:36+08:00



Abang Johari (kiri) melihat replika Jambatan Batang Rambungan yang akan dibina dan siap dalam tempoh tiga tahun ini. Turut kelihatan Julaihi (tiga kanan) serta yang lain. - Gambar oleh Muhammad Rais Sanusi

**KUCHING:** Impian rakyat khasnya warga Tanjong Datu di Lundu dan Sematan untuk memiliki Jambatan Batang Rambungan kini menjadi kenyataan.

Setelah lama menanti, kerja-kerja pembinaan jambatan ini bakal bermula dengan dibiayai sepenuhnya oleh kerajaan negeri di bawah pimpinan Gabungan Parti Sarawak (GPS).

Ketua Menteri Datuk Patinggi Abang Johari Tun Openg berkata, jambatan ini adalah hadiah GPS untuk warga di Tanjong Datu.

"Jambatan ini adalah satu daripada projek yang telah dibatalkan oleh kerajaan persekutuan dan diambil alih oleh kerajaan negeri dengan kos hampir RM100 juta.

"Kerajaan telah menganugerahkan kontrak kepada yang berjaya dan jambatan ini akan hubungi bandar raya Kuching dengan Lundu, Sematan dan Telok Melano.

"Yang penting, kita mempunyai dua jalan akses ke Lundu satunya menerusi Lebuhraya Pan Borneo dari Bau dan satu lagi menerusi Matang ke Rambungan," katanya pada sidang media selepas Majlis Pecah Tanah Jambatan Batang Rambungan, Lundu dekat sini hari ini.

Mengulas lebih lanjut mengenai jambatan ini, Menteri Muda Infrastruktur dan Pembangunan Pelabuhan, Datuk Julaihi Narawi berkata ia merupakan sebuah jambatan jenis kabel tambat (cable-stayed).

Projek ini menelan kos RM98.5 juta dengan panjang keseluruhan 560 meter, dua lorong sehalu. Tempoh pembinaan 36 bulan atau tiga tahun.

"Jambatan ini bakal menjadi landskap ikonik di sepanjang jalan Lundu-Sempadi-Kuching dimana ia turut dilengkapi dengan hiasan lampu seperti yang ada pada Jambatan Darul Hana.

"Apabila jambatan ini siap kelak, perjalanan melalui Jalan Lundu-Sempadi ini tidak lagi terhad mengikut masa operasi feri dan tempoh perjalanan dari bandar Kuching dapat dipendekkan," ujarnya.

Dalam pada itu majlis pecah tanah hari ini telah dihadiri 5,000 penduduk dari sekitar Lundu, Sematan termasuk Kuching dan Bau.

Turut hadir Menteri Perumahan dan Kerajaan Tempatan, Dato Sri Dr Sim Kui Hian; Ahli Dewan Undangan Negeri (ADUN) Tanjong Datu, Datuk Amar Jamilah Anu serta yang lain.